

四庫全書

集部

欽定四庫全書

集部

成都文類卷二

詳校官左中允_臣瑋五珠

助教_臣常循覆勘

總校官知縣_臣繆琪

校對官編修_臣邱庭澂

謄錄監生_臣汪名達

欽定四庫全書

集部八

成都文類

總集類

提要

臣等謹案成都文類五十卷諸家著錄皆稱

宋袁說友編說友字起巖建安人隆興元年

進士嘉泰中官至同知樞密院參知政事是

編前有說友序蓋其慶元五年為四川安撫

使時所作然卷首別有題名一頁稱迪功郎

監永康軍崇德廟庖仲榮迪功郎新差充利
州州學教授楊汝明從事郎廣安軍軍學教
授費士威從事郎前成都府府學教授何惠
固文林郎山南西道節度掌書記宋德之文
林郎前利州東路安撫司幹辦公事趙震宣
教郎新奏辟知綿州魏城縣主管勸農公事
徐景望奉議郎新雲安軍使兼知夔州雲安
縣主管勸農公事借緋程遇孫編集而不列

說友之名說友序中亦但云爰屬僚士撫諸
方策裒諸碑識而無自為裁定之語然則此
集之編出說友之意此集之成則出八人之
手當時舊本題識本明後人以序出說友遂
併此書而歸之非其實也所錄凡賦一卷詩
歌十四卷文三十五卷上起西漢下迄孝宗
淳熙間凡一千篇有奇分為十有一門各以
文體相從故曰文類每類之中又各有子目

頗傷繁碎然昭明文選已創是例宋人編杜
甫蘇軾詩亦往往如斯當時風尚使然不足
怪也以楊慎金蜀藝文志校之所載不免於
挂漏然此集舛始難工而慎書踵事而增則
易於為力固不能一例視之且使先無此書
則逸篇遺什慎必有不能盡考者此書蒐輯
之功固亦未可盡沒矣乾隆四十五年十一
月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書



成肅文類
提要

成都文類序

天地之祕藏發而為名山大川山川之秀靈斂而為文章
華藻二者相為頡頏而光明焉也兩京三都之賦摹寫天
地繪繡山川絢道德揆天庭潤金石諧韶濩與乾坤造
化周流盛大於宇宙之間千百萬世下而知有兩京三
都者以此文也然則天地山川而可無此文哉而可以
不傳此文哉益古大都會也有江山之雄有文物之盛
奇觀絕景仙游神跡一草一木一丘一壑名公才士騷

人墨客窺竒吐芳聲，流文暢散落人間，何可一二數也。凡此者，予來三年，亦既略睹矣。或曰：兩京三都以賦而傳，使無傳焉，斯文泯矣。然則繇漢以來，其文以益而作者，今獨無傳可乎？有益都斯有此文，此文傳益都，亦傳矣。爰屬寮士，撫諸方策，裒諸碑識，流傳之所膾炙，友士之所見聞，大篇雄章，英詞綺語，折法度，極眩耀，其以益而文者，悉登載而彙輯焉。斷自漢以下，迄於淳熙，其文篇凡一千有奇，類為十一目，釐為五十卷。益之文茲備。

矣嗟乎後世之士豈無浮沅湘由巴蜀

關

如司馬

子長者乎豈無上瞿唐過夔梓賦雪錦如杜少陵者乎
又豈無自西蜀歷荆楚棲遲山水間如田游巖者乎倘
復得如二三公者而訪斯益擎斯文焉則知清寧闔闢
至大至廣之內而有所謂蜀蜀六十州亘五千里之內
而有所謂益益都無量江漢炳靈之內而有所謂文者
其不在此書乎是書也而有傳焉庶幾乎無負於益慶
元五年二月望日寶文閣學士通議大夫四川安撫制

度使兼知成都軍府事建安袁說友謹序

成都文類題名

迪功郎監永康軍崇德廟扈仲榮

迪功郎新差充利州州學教授楊汝明

從事郎廣安軍軍學教授費士威

從事郎前成都府府學教授何憲固

文林郎山南西道節度掌書記宋德之

文林郎前利州東路安撫司幹辦公事趙震

宣教郎新奏辟知綿州魏城縣主管勸農公事徐景望

奉議郎新雲安軍使兼知夔州雲安縣主管勸農公事借緋程遇孫編集

欽定四庫全書

成都文類卷一

宋 扈仲榮等 編

賦

蜀都賦

漢揚雄

蜀都之地古曰梁州禹治其江亭皋彌望爵乎青葱丹
青玲瓏石鱗水螭於近則有瑕英茵芝玉石江珠於遠
則有銀鈎錫碧馬犀象麋西有塩泉鐵冶橘林銅陵其

傍則有期牛兕旄金馬碧雞其竹則宗生族攢俊茂豐
美夾江緣山尋卒而起其深則有獼獼沉鰾水豹蛟蛇
其都門二九四百餘閭兩江珥其市九橋帶其流苴竹
浮流龜鼈磧石風胎雨轂衆物駭目百華投春隆隱芳
芬螭燭若揮錦布繡望芒芒兮無幅其布則簞中黃潤
一端數金雕鏤鈎器百技千工上乃使有伊之徒調夫
五味甘甜之和勺藥之羹江東鮐鮑隴西牛羊五肉七
菜勝獸腥臊若其吉日嘉會期於送春之陰迎夏之陽

置酒於榮川之間宅設坐於華都之高堂延帷揚幕接
帳連崗郤公之徒相與如乎陽瀕臣詔羅車百乘期會
投宿觀者方防行船競逐也

右篇得之藝文類聚疑非全文自郤公之徒以下
字義若不相聯屬按左思蜀都賦注云揚雄賦曰
若其漁弋郤公之徒相與如乎巨野羅車百乘觀
者万隄意臣野訛為臣詔万隄訛為方防云

蜀都賦

晉左思

有西蜀公子者言於東吳王孫曰蓋聞天以日月為網
地以四海為紀九土星分萬國錯峙峻岳有帝皇之宅
河洛為王者之里吾子豈亦曾聞蜀都之事歟請為左
右揚擢而陳之夫蜀都者蓋兆基於上世開國於中古
廓靈關以為門包玉壘而為宇帶二江之雙流抗峨嵋
之重阻水陸所湊兼六合而交會焉豐蔚所盛茂八區
而菴藹焉於前則跨躡捷狎枕倚交趾經途所亘五千
餘里山阜相屬含谿懷谷岡巒糾紛觸石吐雲鬱蓋蓋

以翠微崖巍巍以峨峨干青霄而秀出舒丹氣以為霞
龍池瀉瀑瀆其隈漏江沱流瀆其阿汨若湯谷之揚濤
沛若濛汜之涌波於是乎叩竹緣嶺茵桂臨崖旁挺龍
目側生荔枝布綠葉之萋萋結朱實之離離迎隆冬而
不彫常騰騰而猗猗孔翠羣翔犀象競馳白雉朝雉猩
猩夜啼金馬騁光而絕影碧雞倏忽而曜儀火井沈熒
於幽泉高焰飛煽於天垂其間則有虎魄丹青江珠瑕
英金砂銀鑠符采彪炳麗灼爍於後則却背華容北

指崑崙緣以劍閣阻以石門流漢湯湯驚浪雷奔望之
天迥即之雲昏水物殊品鱗介異族或藏蛟螭或隱碧
玉嘉魚出於丙穴良木攢於褒谷其樹則有木蘭棧桂
杞櫛椅桐椳杓楔樅榲楠幽藹於谷底松柏蕭鬱於山
峰擢脩幹竦長條扇飛雲拂輕霄羲和假道於峻岐陽
鳥迴翼乎高標巢居栖翔聿兼鄧林穴宅奇獸窠宿異
禽熊羆咆其陽鷗鶚鳴其陰猿狖騰希而競捷虎豹長
嘯而永吟於東則左緜巴中百濮所充外負銅梁於宕

渠內函要害於膏腴其中則有巴菽巴戟靈壽桃枝樊
以蘊圃濱以鹽池蠟蜴山棲龜鼈水處潛龍蟠於沮澤
應鳴鼓而興雨丹沙艷熾出其坂密房郁毓被其阜山
圖采而得道赤斧服而不朽若乃剛悍生其方風謠尚
其武奮之則實旅翫之則渝舞銳氣剽於中葉蹻容世
於樂府於西則右挾岷山湧瀆發川陪以白狼夷歌成
章垌野草昧林麓黝儵交讓所植蹲鴟所伏百藥灌叢
寒卉冬馥異類衆夥于何不育其中則有青珠黃環碧

若芒硝或豐綠萸或蕃丹椒蘼蕪布護於中阿風連延
蔓於蘭皋紅葩紫飾柯葉漸苞敷藥歲蕤落英飄飄神
農是嘗盧跗是料芳追氣邪味蠲癘疳其封域之內則
有原隰墳衍通望彌博演以潛沫浸以縣洛溝洫脉散
疆里綺錯黍稷油油稷稻莫莫指渠口以為雲門灑漑
池而為滄澤雖星畢之滂沲尚未齊其膏液爾乃邑居
隱賑夾江傍山棟宇相望桑梓接連家有鹽泉之井戶
有橘柚之園其園則有林檎枇杷橙柿棗檮桃函列

梅李羅生百果甲宅異色同榮朱櫻春熟素柰夏成若
乃大火流涼風厲白露凝微霜結紫梨津潤楮栗罇發
蒲桃亂潰石榴競裂甘至自零芬芳酷烈其圃則有藟
蒹芡芡瓜疇芋區甘蔗辛薑陽蔭敷日往菲微月來
扶疎任土所麗衆獻而儲其沃瀛則有攢蔣叢蒲綠菱
紅蓮雜以蘊藻糝以蘋蘩摠莖枕枕裒葉蓁蓁實時
味王公羞焉其中則有鴻鸛鵠侶鷺鷥鵜鵒晨鳧旦至
候雁銜蘆木落南翔冰泮北徂雲飛水宿呀吭清渠其

深則有白龜命鼈玄獮上祭鱸鮓鱗鯢鯉鯊鰭差鱗
次色錦質報章躍濤戲瀨中流相忘於是乎金城石郭
兼市中區既麗且崇實號成都闕二九之通門畫方軌
之廣塗營新宮於夾塏擬承明而起廬結陽城之延閣
飛觀榭乎雲中開高軒以臨山列綺窓而瞰江內則議
殿爵堂武義虎威宣化之闥崇禮之闈華闕雙邈重門
洞開金鋪交映玉題相輝外則軌躅八達里閭對出比
屋連甍千廡萬室亦有甲第當衢向術壇宇顯敞高門

納駟庭扣鐘磬堂撫琴瑟匪葛匪姜疇能是恤亞以少
城接乎其西市鄺所會萬商之淵列隧百重羅肆巨千
賄貨山積纖麗星繁都人士女衮服靚妝賈貿瑇鸞舛
錯縱橫異物詭譎奇於八方布有橿華麤有枕榔叩竹
傳節於大夏之邑葑醬流味於番禺之鄉輿輦雜沓冠
帶混并累轂疊跡叛衍相傾誼譁鼎沸則吮聒宇宙躑
塵張天則埃塏曜靈闌闌之裏伎巧之家百室離房機
杼相和貝錦斐成濯色江波黃潤比筍簞金所過侈侈

隆富卓鄭埒名公擅山川貨殖私庭藏錙巨萬鉞槐兼
呈亦以財雄翕習邊城三蜀之豪時來時往養交都邑
結儔附黨劇談戲論扼腕抵掌出則連騎歸從百兩若
其舊俗終冬始春吉日良辰置酒高堂以御嘉賓金壘
中坐肴核四陳觴以清醪鮮以紫鱗羽爵既競絲竹乃
發巴姬彈絃漢女擊節起西音於促柱歌江上之飄厲
紆長袖而屢舞翩躚躚以裔裔合尊促席引滿相罰樂
飲今夕一醉累月若夫王孫之屬邵公之倫從禽於外

巷無居人並乘驥子俱服魚文玄黃異校結駟繽紛西
踰金隄東越玉津朔別期晦匪日匪旬蹙蹈蒙籠涉獵
寥廓鷹犬倏呻罽羅絡幕毛羣陸離羽族紛泊翕響
揮霍中網林薄屠廩廩剪旄塵帶天地跨彫虎志未騁
時欲晚追輕翼赴絕遠出彭門之闕馳九折之坂經三峽
之崢嶸躡五岬之蹇產戟食鐵之獸射噬毒之鹿拍驅
氓於蔓草彈言鳥於森木拔象齒戾犀角鳥鍛駟獸廢
足殆而竭來相與第如滇池集乎江洲試水客漾輕舟

娉江妃與神游。罨翡翠釣鯉鮪。下高鵠出潛蚪。吹洞簫
發櫂謳。感鱣魚動陽侯。騰波沸涌珠貝汜。浮若雲漢含
星而光耀。洪流將饗獠者張。帝幕會平原酌清醕。割芳
鮮飲御酣。賓旅旋車馬。雷駭轟轟闐闐。若風流雨散漫。
乎數百里之間。斯蓋宅土之所安樂。觀聽之所踊躍也。
焉獨三川為世朝市。若乃卓犖奇譎。倜儻罔已。一經神
怪。一緯人理。遠則岷山之精。上為井絡天帝。運期而會。
昌景福。朐蠶而興。作碧出萇弘之血。鳥生杜宇之魄。妄

變化而非常嗟見偉於疇昔近則江漢炳靈世載其英
鬱若相如皜若君平王褒曄曄而發秀揚雄含章而挺
生幽思絢道德搗藻挾天庭考四海而為雋當中葉而
擅名是故游談者以為美造作者以為程也至乎臨谷為
塞因山為障峻阻塍埒長城豁險吞若巨防一人守隘
萬夫莫向公孫躍馬而稱帝劉宗下輦而自王由此言
之天下孰尚故雖兼諸夏之富有猶未若茲都之無量
也

辨蜀都賦

王騰

人物習性有忠有邪有智有愚出於才行而不由
土產自趙諗狂圖好事者類指以疵蜀人蜀之衣
冠含笑強顏無與辯之者余嘗切齒焉及讀左思
賦見其薄蜀陋吳諂魏以諛晉之君臣苟售一時
之聲價而滅天下之忠義晉之公卿一口稱譽風
俗頹矣士無特操以陷西朝於五胡卒貽萬世之
愧夫魏者漢之賊也原思之詞似欲尊正統而黜

偏方然不顧正氣之淪溺乃知蜀之橫被枉抑其所由來者久矣故作辨蜀都賦以申蜀人之憤氣其商略土風採摭人物不該乎治亂興廢之變邪正是非之理者不在鋪布之限非若前輩之詞主於類聚山川毛羽動植以煥文彩之美觀悅讀誦之利口而已

辨疑先生核理儲思

平

欲析蜀都未繹其辭客有東方

者過而問之曰昔者太冲構十稔之意搜三都之奇文

成示人張華見推士安序焉盛傳于時豈其猶有未盡
而夫子欲糾其所違先生曰嘻予未之知也吾蜀立極
之初域民之始井邑山川之秀人物風俗之美是則左
思備言之矣然而論列人才詳明士類第言文藻之華
揆不及蜀人之忠義遂與吳俗例加抑忌非特沒其實
美且沮之以橫議川靈為之扼腕嶽鎮為之憤氣吾以
此為有遺恨故申言其所以夫品物流形九土分敷惟
有蜀為極險之區羊腸繞其根鐫鳥道駕於至虛行者

却履以視棧乘者投繩而鉤車驗太白之所賦蓋未髣
其錙銖實天限而地隔故山峭而川迂宜若與中夏否
閉而不通其車書也然而朝宗之水浩浩而南傾內附
之山峨峨而東蹙口呀雙劒若邠岐虎啗之吻尾拽二
南乃咸雍金城之麓以其有所附屬而不能自立故命
名者號之曰蜀自西而東昔本無途金牛詐言五丁是
除吾人由之既艱且虞一夫舉足十夫荷儲食黃白以
骨立臥冰藜而裂膚蜀士遠於進取蜀民疲於轉輸嘆

天閣之已邈望秦隴以長吁然且連網之運應聲穿領之牛係路陟長阪以猶及繞大江而不悞指日而物不緩期按籍而民無逋戶邊餉以需上供有裕悉陸海之攸產飽神圉之所聚五季之阨王朴獻謀謀先取蜀以阜兵餼餼足兵強乃征方州時乏遠御朴言不酬及我太祖篡如朴策蜀定國富次平諸國蜀於是時興王有力嚮者孟氏撫循矜憐惠愛其人捐租五年及我王師宣威三川卒無一夫東嚮而控弦蓋傾心於正統眎私

恩猶缺然是使偽命牽羊偏方啣璧顧旌纛以涕泗仆
逵衢而畏積感恩之意則誠効順之心自直豈若他邦
之慙悍怒螳臂於車軋由古而來可得而聞李雄劉闢
季連公孫因仍世難割據坤靈盜蜀而王踵起而霸類
非蜀人三國之際異方鼎峙若南若北輔吳崇魏惟我
蜀人不私非類雖輔璋戴備以自國猶謂吾君之子而
卒臣劉氏晉宋而下南北風馬南鬱屈以遊魂北陸梁
而騁駕衣冠稽首於左袵濟洛順風於氏霸惟此西土

爰歸南化豈赴弱以背強蓋惡夷而即夏迨蕭紀之不
令沂岷江而僭正梁人召寇以救亂魏氏懷姦而託信
彼實包藏此惟附順逆施不惠於宜都內潰爰從於遲
迴豈瞻顧於北風蓋欽恭於王命不惟蜀人不盜蜀都
歷代以來亂離間起在內在外為姦為宄董卓桓氏元
載朱泚龐勛劉闢樊崇韓遂懷克扇亂言不詳紀試考
譜牒按其間里苟揮羿浞之戈悉匪岷嶠之士在唐中
弱齊蔡幽并諧結諸隣唇齒相因叛主之帥逐帥之黥

陸梁百年不為王臣是亦何嘗連吾蜀民帝室內訌孽
牙匪彛震動萬乘再狩于西民與其帥開闢逐之天王
蒞止百官六師國用告乏衆艱于飢與其吏民繹粟輸
之比其還歸恬不知危茲蓋處平則率理以奉京邑之
靈遭變則自完以待中原之睦欲携之則難叛欲一之
則易服豈特文有餘而武不足耶亦其天資正順而敦
孰近者趙諗圖結巴渠包藏歷年困於無徒爰及吳儔
妖謀是趨蜀人白發遄服其誅由是言之蜀何負於君

王歟思徒見其隣於西夷遠於上國謂丘壑之險鄙方隅之僻但分中外之質麗不決正邪之名實胡所據耶成周之盛四海同風冠帶所加古無比隆淮徐連齊魯之軫而有夷伊洛按豐鎬之都而有戎方春秋之尊夏視吳楚如貉蟲大周宗伯而不數抑又矧於閩中雖今俊乂之所出在昔語言之不通是則與我均為遠服安得妄論其異同然而自差觀之華陽黑水別封畛於堯籍岷山導江歷經營於禹跡秦氏剖符李冰擁節五政

七賦被自古昔而四載所至南止荆揚之域荆揚之民
島夷卉服矧又過此以往耶百粵之取始自漢武郡國
雖叛衣冠未楚所謂粵人無用章甫常衮化之士乃文
舉然則論淺深之時較久近之序烏可與蜀同日而語
王莽元舅霍山豕勲遺愛帝堦林甫王孫許李聯堦於
黼座封裴接棟於楓宸既同心於肺腑亦託體於親隣
逞螟蛉之毒噬為虺蜮於君親是則勢疎者未必孽惡
地近者未必誠純我雖遠於國而忠則邇也高下既別

一召一四太行成臯三門二穀或壯帝王之形勢或資
姦盜之咆哮或王路之攸梗或伏兵之所交正用之則
亦在德枳邪憑之則遂為寇巢吾人之心如砥吾人之
行如螳結羶美於一心捐崎嶇於萬里申韓生於中土
不免為僻學鄭衛作於中州不免為僻樂九野同列於
地何獨非梁益之墟四隅無私於天曷常戾西南之角
況乎江行地脉鮮決掃而敗岸星直天狼工弭姦而觸
惡肖此正氣挺吾先覺節以遇立大非苟作王褒明君

臣之合何武憤福威之削張綱扼腕於跋扈揚子甘心
於寂寞相如不數子昂見却謂誦述以阿諛恐吾徒之
貽忤才高則委靡面覲氣直則回邪膽落彼徒嫉於西
子殊不慚其鄭璞不意兒曹惜其志行之僻反以居處
僻我也且圃植蕙而菜育畦毓禾而莠生梟倫鳳族蛭
肖龍蟠君子小人常溷其間古何邦而無佞亦何地而
無賢龜蒙孔孟之悠宅冀北唐虞之所營宜丘門之不
雜何躋黨之橫行繇為父而禹子蔡為弟而旦兄導挺

節而敦逆矣推忠而杞姦彼為同屬以行異況指一方而槩言吾請與子姑置遠近之殊而據正邪之辨晉取之魏魏取之漢功非定亂位實圖篡思誠晉人言諛而辯辭抑蜀以黜吳志借魏而佞晉魏為高廟之寇賊蜀實中山之宗姓不然何故進亂世之姦雄而沮先王之枝屬乎况蜀以得賢而王失賢而亡魏以已篡而張以人篡而戕彼賦魏事徒言刑罰之清平胡不言文若之殞命也彼言忠良之聚會胡不言三馬之食槽也詞未

及已客奮而起獲聞高義欽服厥旨嘆草澤之空言不能廷辨於天子

畫桐花鳳扇賦

唐李德裕

成都夾岷江磯岸多植紫桐每至暮春有靈禽五色小於玄鳥來集桐花以飲朝露及華落則煙飛雨散不知其所往有名工繪於素扇以償稚子余因作小賦書於扇上

桐始華兮綠江曙粲鮮葩兮泣朝露樹騰騰兮霞舒鳥

爛爛兮星布彼嘉桐兮貞且猗當暮春兮發英蕤豈鵲
鵲之珍族又棲託乎瓊林彼零露兮甘且白涵曉月兮
洒鮮澤豈青鳥之靈儔常飲吮乎玉液有嘉穀而不啄
有喬松而不適獨美露而愛桐非人間之羽翮運花落
而春歸忽雨散而川寂悵丹穴之何遠想瑤池而已隔
爰有妙工圖其麗容宛宛兮若餐珠于芳蕊飄飄兮疑
振羽于光風感班姬之素扇空皎潔兮如霰亦有美人
增華點絢雀伺蟬而輕驚

南朝畫扇
九重蟬雀

女乘鸞而微眄未

若繪斯禽於玲筵動涼風於羅薦非欲發長秋之清香
掩短歌之孤轉庶玉女之提攜列崑墟之瑤宴乃為歌
曰

青春晚芳芳節闌敷紫華兮蔭碧湍美斯鳥兮類鸛鸞
具體微兮容色丹彼飛翔于霄漢此藻績於冰紈雖清
秋之已至常愛玩而忘食

茅茨賦

唐朱桃椎

若夫虛寂之士不以世務為榮隱遁之流乃以閒居為

樂故孔子達士仍遭桀溺之譏叔夜高人迺被孫登之笑况復尋山翫水散志娛神隱臥茅茨之間志想青雲之外逸世上之無為亦處物之高致若乃覩茲庵室終諸陋質野外孤標山旁迥出壁則崩剝而通風簷則摧頽而寫日是故閒居晚思景媚青春逃斯澗谷委此心神削野藜而作杖卷竹葉而為巾不以聲名為貴不以珠玉為珍風前引嘯月下高眠庭惟三逕琴置一絃散誕池臺之上逍遙巖谷之間逍遙兮無所託志意兮還

自樂枕明月而彈琴對清風而緩酌望嶺上之青松聽
雲間之白鶴用山水而為心翫琴書而取樂谷裏偏覺
鳥聲高聲高韻盡相調見許毛衣真亂錦聽渠聲韻宛
如歌調絃乍緩急向我茅茨集時逢雙燕來屢值遊蜂
入冰開綠水更應流草長階前還復濕吾意不欲世人
交我意不欲功名立名立也不須高摠知世事盡徒勞
未會昔時三箇士無故將身殞二桃

先生知足離居盤桓口無二價日惟一食築土為

室卷葉為冠斲輪之妙齊扁同觀

憫相如賦

楊天惠

祖重黎之洪懿兮系中山之蟬聯
食岷峨之舊德兮飲江漢之靈源
皇既私卿以多技能兮卿又附益之
以師友之傳招湘君使侍書兮麾
藺卿為我騁綜藝文之要妙兮申
劔術之雄妍載而之四方吾將鼓
行諸公之間視騎郎之多冗兮義不
辱於周旋顧嚴鄒之差強人意兮
聊步武於梁垣惟才高之寡合兮
以其遭遇之難靡

歲月於官學兮嗟不耦而空還徑千里而一歇兮跂喬
木於故山殆而竭來第如臨邛兮存故人之間闕起握
手相勞苦兮意氣與之拳拳彼汚令之體苛兮矜縻禮
之闌單慨非余心之所悅兮矧駟僮之與同盤強要卿
以俱行兮卿固已薄其所以然標使者於門兮出告之
以不聞何隆初而殺終兮卒俛首而從旃彼遷虜何為
者兮竊東向於肆筵紛臭處之逼人兮笑言呀以更謹
于意卿食不下咽兮奚宴安乎末歡酒參半而奏音兮

四座寂以無喧嗟輦下之遺直兮固泮忍而不鮮嫫冶
容而亡賴兮猥自成乎哀彈懿長離之文章兮非鸞凰
其誰匹曷伴鵠以為媒兮即游臬而接翼棄朝陽之顯
敞兮集此榛莽之蒙密也吐竹梧之芬馨兮爭羶腥之
餘啄也度將鵠以授意兮吾固不審卿之所謂也卿縱
懷彼臬以好音兮吾恐彼臬之終弗類也既么麼又不
材兮曾何足以溷箕帚之後決惟簿而夜奔兮毀悅襦
而不入鄉胡倂然不自喜兮安受此蠹蝕豈其不禁枉

杓兮恍沈冥而不自克寧卿意之易敗兮移氣體於終
食人固醉而悞醒而悔兮庸何傷於好德恠卿初弗定
此計兮後又狂驚而不復入不慙鄉杖者之善罵兮出
不差賢牧伯之餘澤厭儒衣之巨麗兮襲隸人之褻服
雖雜作而忘劬兮蔽泥水以為飾悵遷虜猶不堪其憤
兮卿獨何施於眉目始吾嘉卿之好音兮殆將以禮乎自
持進有虞之雅操兮紹尼父之聲詩胡中道自絕于前
修兮乃陷而入於桑濮之為終吾偉卿之能賦兮工

謫諫而不怒攝侈汰之瀾翻兮卒歸之於王度唁御躬
之不蚤正兮尚何以禁切於人主嗟乎操行之不得兮
躡終古而增汚挽天河以自湔兮吾恐垢氣之不能去
亂曰邛山迤邐邛水悠兮日跳月踔郵千秋兮歸然遺
宇底沈湫兮浮魂輓魄尚想遊兮我欲堙并剗梧楸兮
死者可作庶無尤兮孰是人斯而有是醜兮尚俾來者
毋懼此垢兮

憫相如賦

鄭少微

建長卿之絕塵邈下眎於屈宋思眇眇以入微辭蔚跂
而易貢驚八紘之津涯括動植而錯綜擢篆籀於重泉
幹形聲而磬控當其奮翼巴庸前無古人拾阮灰之斷
簡搜屈壁之遺文紛齊魯之老師徒騁辯於說鈴蛻筆
土梗鼻端運斤專兔園之右席麾鄒枚於嘖呻顧天西
之櫟社悵夜錦之未晨念絃歌之石友暢落魄於情親
夫何賡人之艷艷兮感熠燿之宵光矚綺疏以託誠兮
佩徽音而易忘嗟父母之不聰兮昧彼都之丰臧盼星

河之照闡兮徑遡洄而往從縉紳先生而為此歎涼德
汙行既不勝誅閭閻烈女世未乏諸足不下堂步中瑀
琚紉幽蘭以為裳兮鈿美玉以為車豈無泳漢之游女
兮亦有采桑之秋胡秉周禮以律身兮諒冰雪之難渝
裨化國之陰教兮飾家道之權輿爾弗安于正吉兮蒙
惡聲於簡書訪舊壚於故老莽榛蕪之離離智井乃貪
泉之戒修梧寔曲木之規渴者勿汲暍者勿栖噫嘻余
觸類取譬操觚默惟滔滔儒服相遠幾希棲處子者迷

忠義之大閑窺鄰牆者閭富貴之危機斥鴈幣之聘媒
妁之辭墻間之夫河間之婦等亡羊耳未容勝負又奚
獨料理十日卜之與典牛邪

苦櫻賦

并序

何耕

余承乏成都郡丞官居舫齋之東有櫻樹焉本大
實小其熟猥多鮮紅可愛而苦不可食雖鳥雀
亦棄之感而賦之

始余至於官居盼茲樹之特奇榦擁腫以上達條扶踈

而下披蔭露井其有餘知封植之幾時或告予以含桃
出饒涎而流頤意薦廟之珍果必甘滋之若飴幸一熟
之得嘗指麥秋以為期忽春事之已晚訝子結之獨遲
初瑣碎以破蕾漸繇稠而着枝聊攀摘以適口乃苦澁
而顰眉類置膽於越國異如薺於周詩謝芳液之津
津空殷紅之累累誤來集之衆鳥誑無知之羣兒感人
事之大謬為累歎而齎咨或名美而實乖或表盛而裏
虧或色厲而內往或迹公而情私驚翰假於鳳鳴羊質

蒙於虎皮佞似聖以疇測姦託儒而莫窺莽恭儉以竊國
外博辯以僵尸談仁義其可樂視所履而舛馳儼衣冠
於民上為賈豎之不為方滔滔以皆是奚一木之足悲

成都文類卷一

欽定四庫全書

成都文類卷二

宋 扈仲榮等 編

詩

詩亡久矣漢宣帝神爵五鳳之間數有嘉應頗作歌
詩蜀人王褒始為益州刺史王褒作中和樂職宣布
詩依鹿鳴之聲歌之其義存而辭亡惜哉今取凡詩
緣成都而作者載之其類十有四於類之中又有別

焉若其人則以世先後為序其在前代者并記國號
在本朝者止書氏名茲其凡也

都邑

城郭

宮苑

樓閣

蜀道難

梁劉孝威

岵山金碧有光輝
遷停車馬正輕肥
彌思王褒擁節去
復憶相如乘傳歸
君平子雲寂不嗣
江漢英靈已信稀

同前

陳陰鏗

王尊奉漢朝靈關不憚遙
高長有雪嶺隴棧已經燒
輪

摧九折路騎阻七星橋蜀道難如此功名詎可要

賦得蜀都

唐褚亮

列宿光輿井分土跨梁岷沉犀對江浦駟馬入城闔英
圖多霸跡歷選有名臣連騎簪纓滿含章詞賦新得上
僊槎路無待訪嚴遵

成都府

唐杜甫

翳翳桑榆日照我征衣裳我行山川異忽在天一方但
逢新人民未卜見故鄉大江東流去遊子去日長曾城

填華屋季冬樹木蒼喧然名都會吹簫聞笙簧信美無
與適側身望川梁烏雀夜各歸中原杳茫茫初月出不
高衆星尚爭光自古有羈旅我何苦哀傷

蜀道難

唐李白

噫吁噉危乎高哉蜀道之難難於上青天蠶叢及魚鳧
開國何茫然爾來四萬八千歲不一作迺與秦塞通人煙

西當太白有鳥道可以橫絕峨眉巔地崩山摧壯士死

然後天梯石棧方

一作相

鈎連上有六龍回日之高標

一作

橫河斷海
之浮雲

下有衝波逆折之回川黃鶴之飛尚不得過

猿猱欲度愁攀援

一作牽

青泥何盤盤百步九折縈巖

巒捫參歷井仰脅息以手撫膺坐長歎問君西遊何時

還畏途巉巖不可攀但見悲鳥號古木雄飛雌從遠林

間又聞子規啼夜月愁空山蜀道之難難於上青天使

人聽此凋朱顏連峯去天不盈尺

一作幾千戶

枯松倒挂

倚絕壁飛湍瀑流爭喧飈砅崖轉石萬壑雷其險也若

此嗟爾遠道之人胡為乎來哉劍閣崢嶸而崔嵬一夫

當關萬人

一作夫

莫開所守或匪親

一作人

化為狼與豺朝

避猛虎夕避長蛇磨牙吮血殺人如麻錦城雖云樂不

如早還家蜀道之難難於上青天側身西望長咨嗟

一作

嗟令人

右詩諷章仇兼瓊也或以為斥嚴武陸暢雅

為韋臯所厚乃作蜀道易以美臯云蜀道易

易於履平地

上皇西巡南京十首

前人

邊塵輕拂建章臺
聖主西巡蜀道來
劒壁門高五千尺
石為樓閣九天開

九天開出一成都
萬戶千門入畫圖
草樹雲山如錦繡
秦川得及此間無

德陽春樹號新豐
行人新都若舊宮
柳色未饒秦地綠
花光不減上林紅

誰道君王行路難
六龍西幸萬人歡
地轉錦江成渭水
天迴玉壘作長安

萬國同風共一時錦江何謝曲江池石鏡更名天上月

後宮親

一作新

得照娥眉

濯錦清江萬里流雲帆龍舸下揚州北地雖誇上林苑
南京還有散花樓

錦水東流照錦城星橋北挂象天星四海此中朝聖主

峨眉山上

一作下

列仙庭

秦開蜀道置金牛漢水元通星漢流天子一行遺聖跡

錦城長作帝王州

水涿天青不起塵風光和暖勝三秦萬國煙花隨玉輦
西來添作錦江春

劍閣重關蜀北門上皇歸馬若雲屯少帝長安開紫極
雙懸日月照乾坤

征蜀聯句

憲宗元和元年正月詔高崇文征蜀九月擒劉闢以獻聯句當是蜀平後

作

唐韓愈孟郊

日王忿違傲有命事誅拔蜀險豁關防秦師縱橫猶愈
風旗市地揚雷鼓轟天殺竹兵彼皴脆鐵刃我鎗巖郊

刑神咤莽旄陰焰飈犀札翻霓紛偃蹇塞野瀕塊坵愈
生獐競掣跌癡突爭填軋渴鬪信飀嗽姦何喫嚼郊
更呼相毆蕩交斫雙缺齧火發激鉗腥血漂騰足滑愈
飛獠無整陣翩鶻有邪戛江倒沸鯨鯢山搖潰樞狹郊
中離分二三外變迷七八逆頸盡綴索仇頭恣髭鬚怒
鬚猶鬚鬚斷擘仍瓢瓠愈石潛設奇伏穴覷騁精察中
矢類妖獠跳鋒狀驚納蹋翻聚林嶺斗起成埃坵郊旆
亾多空枉軸折鮮聯轄剝膚浹瘡痍敗面碎剝剝渾奔

肆狂勦捷竄脫趨點巖鉤踔狙猿水澆雜鱸蝟投奔闌
碯礱填湟倭倭脩愈強晴死不閉獷眼困逾眊焚堞燬
歌嬉扶門呀拗闔天刀封未坼首膽懾前握跼梁排郁
縮闔竇楔窰竅迫脅聞雜驅咿咿咩冤跣窮區指清
夷兇部坐雕鏤印文裁斐疊已豔收娼媼推肥牛呼牟
載實駝鳴圓聖靈閃頑器燾養均草蔡下書遏雄虺解
罪吊孽瞎愈戰血時銷洗劍霜夜清刮漢棧罷囂闐獠
江息澎八戍寒絕朝乘刃暗歇宵答始去古飛蜂及歸

柳嘶蜚廟獻繁馘級樂聲洞控揭郊臺圖煥丹玄郊告儼

匏稽念齒慰微鰲視傷悼癰疣休輸任訛寢報力厚楚
秭公歡鐘晨撞室宴絲曉拈盃孟酬酒醪箱篋饋巾帨
小臣昧戎經維用贊勲愈

成都曲

唐張籍

錦江近西煙水綠新雨山頭荔枝熟萬里橋邊多酒家
遊人愛向誰家宿

井絡

唐李義山

井絡天彭一掌中，湯誇天設劍為峰。
陣圖東聚燕江口，邊柝西懸雪嶺松。
堪歎故君成杜宇，可能先主是真龍。
將來為報姦雄輩，莫向金牛訪舊蹤。

中元甲子以辛丑駕幸蜀 唐羅隱

邪氣奔屯瑞氣移，清平過盡到艱危。
縱饒犬彘迷常理，不奈豺狼幸此時。
九廟有靈思李令，三川悲憶恨張儀。
不憐一曲還京樂，重對紅蕉教蜀兒。

蜀中三首 唐鄭谷

馬頭春向鹿頭關
遠樹平蕪一望闌
雪下文君沽酒市
雲藏李白讀書山
江樓酒恨黃梅後
村落人歌紫芋間
堤月橋煙好時景
漢庭無事不經蠻

夜多無雨曉生塵
草色蠻光日日新
蒙頂茶畦千點露
浣花牋紙一溪春
揚雄宅在唯喬木
杜甫臺荒絕舊隣
却共海棠花有約
數年留滯不歸人

清遠江清碧簾紋
小桃花繞薛濤墳
朱橋直指金門路
粉堞高連玉壘雲
牕下斷琴翹鳳足
波中濯錦散鷗羣

子規夜夜啼巴樹不並吳鄉楚國聞

悼蜀詩

張詠

至道紀號元祀春正月為審官院考績引對
天子曰天厭西蜀歲薦饑饉任失其人枉政
殘剥民興怨嗟構孽肆暴授命虎旅殄滅兇
逆矧彼黔首不聊其生官人安民朕意固怠
寬則育姦猛則殘俗得夫濟者實難其人爾
惟方直歷政有蹟叩焚幽遐往理其俗克畏

克愛汝其欽哉祇奉厥命乘輅西征夏四月
二十有八日供厥職噫謀術庸陋罔敢怠忽
豪猾抑之賦歛乃息存恤窮困招綏流亡杜
厥剝削宣揚皇風間一歲而民弗克安非郡
縣之罪偏將之罪也有聽者孰不知民心上
畏王師之剝削下畏草孽之強暴乎良家困
弊漸復從賊庶賒其死深可忿也天子遠九
重孤賤者憚權豪而不敢言嗚呼雖采詩之

官闕之久矣然歌詠諷刺亦不可寂然詠敢
作悼蜀古風詩四十韻書於視政之廳有識
君子幸勿以狂瞽為罪

蜀國富且庶風俗矜浮薄奢僭極珠貝狂佚務娛樂虹
橋吐飛泉煙柳閉朱閣燭影逐星沉歌聲和月落關雞
破百萬呼盧縱大噓遊女白玉璫騎馬黃金絡酒肆夜
不扃花市春慚怍禾稼暮雲連紉繡淑氣錯熙熙三十
年光景倏如昨天道本惡盈侈極禍必作當時布政者

罔思救民瘼不能宣淳化移風復儉約情性非方直多
為聲色著從欲竊虛譽隨俗縱貪攫蠶食生靈飢作威
恣暴虐佞罔天子聽所利唯剝削一方忿恨興千里攘
臂躍火氣烘寒空雪彩揮蓮鐔無人能却敵何暇施擊
析害物黷貨輩皆為白刃爍瓦礫積臺榭荆棘迷城郭
里第鏐苔蕪庭軒喧鷺雀斗粟金帛市束芻羅綺博悲
夫驕奢民不能飽葵藿朝廷命元戎帥師盪克惡虎旅
一以至梟巢一何弱燎毛焰晶熒破竹鋒熠燿兵驕不

可戢殺人如戲謔
悼耄皆罹誅
玉石何所度
未能剪強
暴爭先謀剽
剽良民生計空
賒死心殞獲
四野構豺狼
五畝孰耕鑿
出師不以律
餘孽何由却
俾夫熾蜂蠆
寡術能籠絡
邊陲未肅清
胡顏食天爵
世方尚奔競
誰復振蹇諤
黃屋遠萬里
九重高寥廓
時稱多英雄
才豈無衛霍
近聞命良臣
拭目觀奇略

成都書事百韻詩并序

薛田

金蹕輿壤玉壘名區
風物尚饒曠古稱最僕

守茲職任五年載至初則木牛流馬馳八使
以均財次則皂蓋朱轡奉一麾而作鎮歷覽
勝異慷慨興懷古人曰非感發不可以言詩
非聲詩不可以導志故言成志激流為美談
偶因公退輒作成都書事七言一百韻止陳
乎益都事蹟罔暇以外景加諸庶幾謬發於
斐然詎敢芳揚於作者其詩曰

混茫不變造西阡物象熙熙被一川
易覺錦城銷白日

難歌蜀道上青天雲敷牧野耕桑雨柳拂旗亭市井煙
院鎖玉溪留好景坊題金馬促繁絃風流鋪席堆紅豆
瀟灑門庭映碧鮮表狀屢言同穎穗敕書頻獎並生蓮
旋科杞樹炊香稻剝種晚巢沃晚田仁宅不隲由政立
議聞無取任情遷民知禮遜蠹叢後俗尚奢華遂古先
遶郭波濤來浩浩歸朝岐路去綿綿乍回黑水將成道
潛到青羊恐遇僊靚女各攻翻樣繡衽商兼製呀紋牋
壚邊泛蟻張裙幄江上鳴鼉簇綠船石筍岐嶒衙對峙

琴臺恢濶寺相連
羣葩艷裏珍禽語
百草香中瑞獸眠
喜處必臻尤佇望
勝遊爭倦更遷延
早荷葉底蹲鵲伏
椶樹梢頭亂蝶穿
巖發牢盆渾棄鹵
鐵資園法免鉅鉛
豐饒物態寧殊越
美麗姝姬酷類燕
西海號雄彰傳紀
南康辭健積銘鑄
良工手技高容學
妙隱丹方秘不傳
倚劔靈關凌絕頂
夢刀孤壘削危巔
金華巷陌遺三品
石鏡伽藍露一拳
信落荊州隨鼓枻
檢頒芝闕聽搖鞭
若量內地寒暄異
且在遐陬水陸全
渝舞舊云傳樂府

巴談誰曰繫言詮九包綰就佳人髻三閨裝成子弟鵲
欲辨坤維尋地理纔臨益部認郊廛文翁室暗封苔蘚
葛亮祠荒享豆籩貨出軍儲推賑濟轉行交子頌輕便
氣蒸藟藟根鬚潤日罩榎楠樹影圓藥市風光蟲蟄外
花潭遨樂鵲鳴前聚源待擬求鳧氏貯怨那能雪杜鵑
蘂植森榮還蓊蔚夾流湍迅迴潺湲鮮明機杼知無算
細碎錐刀不啻千合伴鷗鷺齊窈窕對陪霓袖競翩翩
五門冷映岷峨雪千里爰疏灌壩泉茂盛八弦宜得最

膏腴十道比俱偏
袁滋不到生無分段相
重來宿有緣
款召相如登兔苑
驟遷太白步花甌
歲稔草木時為瑞
奇秀江山代產賢
曉後細風紅灼灼
夜中微雨碧芊芊
錦亭焰燭明歌障
繡閣香氈煖熨氈
寶塔徘徊停隼旟
觀街雜沓擁輜輶
醪醕引架家家郁
躑躅攀條處處妍
重愛魯儒提德柄
威降曹將董戎旃
歡謠少負實人勇
長講多經楚客禪
似簇綺羅偏煥耀
如流車馬倍喧闐
搢機顯綽名堪錄
題柱芬芳事莫捐
李特鋒銳徒恃險

張儀規畫自持顛鷹揚器業成悠久烏合姦雄敗轉旋
漫向鼎分澄霸道却當龜化驗都壓強貪楚滅悲傾轍
廣洽堯詢喜慕羶側弁猖狂拋玉笋歸鞍酩酊墜金鈿
氛埃屏息雲常覆稼穡繁滋澤靡愆睿聖宵衣垂迺睠
貴臣馳日每傳宣石牛道路加歌饗江瀆隆區助潔蠲
避暑亭臺珍簟設縱閒池沼釣絲牽遮蠻帶礪長能固
捍蜀金湯遠益堅何武甲科曾繼踵嚴遵卜兆罕差肩
讐書競印諸家集博識咸修百氏箋紙碓暮春臨岸許

水搏春注截河壩華嚴像閣涼堪愛淨衆松溪僻可憐
學射崔嵬橫菴靄放生寬廣媚漪漣蘇庭嫩筍青簦簪
風檻新荷綠扇扇守戎貌貅千萬騎采葑簪笏兩三員
清江瀉執方流弢大面盤形正壓乾電掃谷風藏虎嘯
雷噴宮樹灑龍涎郤占遯應星舒彩藥嘆端聆火撲燃
令範式驅民缺缺咨謀疇倚道平平性寒甘蔗孫偷齒
體膩芭蕉蠹莫沿誌讀備興重掩卷史看唐幸懶終篇
雕盤姹女呈酥作水巷癡童颺紙鳶初下鹿頭迷郭杜

暫來犀浦誤伊瀍變秦言語生皆會變土情懷死不悛
結厦斧斤宗簡易入神丹腹厲精專柳堤夜月珠簾捲
花市春風繡幕褰十縣版圖分戶籍一城牌肆係民編
受辛滋味饒薑蒜劇饌盤食足鮪鱸月季冒霜秋肯挫
荔支衝瘴夏宜然幾番藂菁鳴虛籟是箇園林噪懶蟬
蠢動乘時先養育菁英屆候別陶甄地丁葉嫩和嵐採
天蓼牙新入粉煎平代啟聞聞繼笈監軍憑軾見劉焉
蕙蘭馥裊幽蹊畔菱芡交鋪曲島邊繒網晚晴誇蹴踘

畫繩寒食戲鞦韆氤氲紫霧濛都邑縹渺彤霞聚倥傯
蟻伏自然銷劒戟螻蛄幾度起戈鋌宦遊止歎音塵闕
鄉飲何驚歲月遄靈壽桃枝奇共結金砂銀鑠貴相聯
埋輪昔按均輸命叱馭今分太守權徒為行春飛皂蓋
詎能許國報青錢政經旋考尤多僻民瘼深求尚未痊
雖愧袴襦非叔度且期毫墨有馮涓倂遵廉察思從訓
克謹操修敢好畋南市醉過攢幟隊西樓歡坐列瓊筵
煩囂謹畏傷淳厚惠黠周防近巧譚重祿省心宜致寇

薄材莊貌若臨淵扶危頗異巢居幕勸善還同矢在弦
叨莅一麾康遠俗等閒光景又三年

成都

宋祁

風物繁雄古奧區十年儋父巧論都雲藏海客星間石

成都有一石人傳嚴君平所辨星石今在嚴真觀

花識文君酒處壚兩劍作關

屏對繞二江聯派練平鋪此時全盛超西漢還有淵雲
杼頌無

城郭

奉和嚴中丞西城晚眺

唐杜甫

汲黯匡君切，廉頗出將頻。
直辭才不世，雄畧動如神。
政簡移風速，詩清立意新。
層城臨暇景，絕域望餘春。
旗尾蛟龍會，樓頭鷺雀馴。
地平江動蜀，天濶樹浮秦。
帝念深分閫，軍須遠算緡。
花羅封峽蝶，瑞錦送麒麟。
辭第輸高義，觀圖憶古人。
征南多興緒，事業暗相親。

錦城曲

唐溫庭筠

蜀山攢黛留晴雪，
蒼筤蔽牙縈九折。
江風吹巧剪霞綃，

花上千枝杜鵑血杜鵑飛入巖下叢夜叫思歸山月中
巴水漾情情不盡文君織得春機紅怨魄未歸芳草死
江頭學種相思子樹成寄與望鄉人白帝荒城五千里

蜀城春望

唐崔塗

天涯憔悴身一望一帖巾在處有芳草滿城無故人懷
材皆得路失計自傷春清鏡不堪照鬚毛愁更新

覽蜀宮故城作

宋祁

國破江山老人止岸谷推鴛飛今日瓦鹿聚向時臺故

苑猶霏雪荒池但劫灰顛遺糊處壞闔記數殘枚恨月
窺林下悲風覓隴來依城孤獨宿失厦驚裴回廢社纔
存樹陰垣自上苔有情惟杜宇長為故王哀

觀古魚鳧城

在溫江縣北十五里有小院

孫松壽

野寺依脩竹魚鳧迹半存高城歸野壠故國靄荒村古
意憑誰問行人謾苦論眼前興廢事煙水又黃昏

宮院

宣華苑宮詞

蜀王衍

輝輝赫赫浮玉雲宣華池上月華春月華如水浸宮殿
有酒不醉真癡人

晚步宣華舊苑

范成大

喬木如山廢苑西古溝臨水靜鳴池吏兵悉率更番後
樓閣崔嵬欲暝時有路冷螢猶照草無風驚鵲自遷枝
歸來更了程書債目眈昏花燭穗垂

樓閣

登成都白菟樓

晉張載

重城結曲阿飛宇起層樓累棟出雲表峽嶺臨太虛高
軒啟朱扉迴望暢八隅西瞻岷山嶺峩我似荆巫蹲鵠
蔽地生原隰植嘉蔬雖遇堯湯世民食恒有餘鬱鬱小
城中岌岌百族居街衢紛綺錯高甍夾長衢借問揚子
舍想見長卿廬

登樓

唐杜甫

花近高樓傷客心萬方多難此登臨錦江春色來天地
玉壘浮雲變古今北極朝廷終不改西山寇盜莫相侵

可憐後主還祠廟日暮聊為梁父吟

登錦城散花樓

唐李白

日照錦城頭朝光散花樓金牕夾繡戶珠箔懸瓊鉤飛
梯綠雲中極目散我憂一作愁暮雨向三峽春江繞雙流
今來一登望如上九天遊

晚夏登張儀樓呈院中諸公 唐段文昌

重樓牕戶開四望劍煙埃遠岫林端出清波城下迴乍
疑蟬韻促稍覺雪風來併起鄉關思銷憂在酒杯

同前

唐姚向

秦相架羣材登臨契上台
槎從銀漢落江自雪山來
儼曲親流火凌風洽小杯
帝鄉如在目欲下盡徘徊

同前

唐溫會

危軒重叠開訪古上徘徊
有舌嗟秦策飛梁認楚材
雲霄隨鳳到物象為詩來
欲和關山意已歌調更哀

同前

唐楊汝士

從公城上來秋近絕纖埃
樓古秦規在江分蜀望開
遠

山標宿雪末席本寒灰陪賞今為忝臨歡敢訴杯

同前

唐李敬伯

層屋架城隈賓筵此日開文鋒摧八韻星分應三台望
雪煩襟釋當歡遠思來披雲霄漢近覺出塵埃

同前

唐姚康

登覽值晴開詩從野思來蜀川新草木秦日舊樓臺池
影搖中座山光接上台近秋宜晚景極目斷浮埃

散花樓

唐張祜

錦江城外錦江頭迴望秦川上
軫憂正值血魂來夢裏
杜鵑聲在散花樓

北樓

宋祁

少城西北之高樓此地蒼茫天意秋
驚風白日忽已晚
落日長年相與愁極塞雲物自慘澹
趨林鳥雀時啁啾
纓上朔塵久不洗安得手弄滄江流

西樓夕坐

前人

炎氛隨日入岑寂坐遙帷倦鶯昏
投浦驚蟬夜去枝桂

華兼月破槎影帶星移珍重窻風好羲皇卽此時

陪孫之翰大博登成都樓

張俞

齷齪古之人傷心廣陵廢遂絃蕪城歌半夜一揮涕
蕙紈隨草衰藻黼歸塵翳冤石歛丘封歌堂從水逝
蕙光杳沈滅吞恨徒千歲我懷吳蜀國旣亂若符契
目覽臺殿心感君王墟世干戈日馳逐狼虎爭吞噬
山河寶天塹城闕巍地肺霸力不久炎倏忽如焚薶
空餘萬雉城岌倚寒雲際麋鹿玩芊陰狐狸棲棘衛
江漢含嗚咽

我抱迢迢荒村烟火遙落日寒風厲因知市朝人自古
悲興替

散花樓

喻汝礪

濯錦江邊莎草濃散花樓畔天芙蓉蜀山疊疊修門遠

誰把丹心問李鄘

唐討淮蔡李鄘藉帑藏以獻田
是諸道皆助軍費自鄘倡之

西樓秋晚

范成大

樓前處處長秋苔俯仰璿杓又欲回殘暑已隨涼燕去
小春應為海棠來客愁天遠思無託吏案山橫睡有媒

晴日滿窗鳬鶩散巴童來按鴨爐灰

冬至日銅壺閣落成

前人

走徧人間行路難異鄉風物雜悲懼三年北戶梅邊暖
萬里西樓雪外寒已辨鬢霜供歲籥仍拚髀骨了征鞍
故園雲物知何似試上東樓直北看

西樓獨上


前人

竹日駐微暑松風生早秋閒尋來處路獨倚靜中樓老
景驅雙轂鄉心挽萬牛相隨木上坐腳底亦雲浮

欽定四庫全書

成都文類
卷二

三



成都文類卷二

欽定四庫全書

集部

成都文類卷五

三至

詳校官左中允_臣塘五珠

助教_臣常循覆勘

總校官知縣_臣繆琪

校對官編修_臣邱庭澂

謄錄監生_臣汪名達

欽定四庫全書

成都文類卷三

宋

扈仲榮等編

詩

江山

池沼

堤堰

橋梁

江漲

唐杜甫

江發蠻夷漲山添雨雪流大聲吹地轉高浪蹴天浮魚
鼈為人得蛟龍不自謀輕帆好去便吾道付滄洲

江漲

前人

江漲柴門外兒童報急流下床高數尺倚杖沒中洲細
動迎風驚輕搖逐浪鷗漁人繫小楫容易拔船頭

江上值水如海勢聊短述

前人

為人性僻耽佳句語不驚人死不休老去詩篇渾漫興
春來花鳥莫深愁新添水檻供垂釣故著浮槎替入舟
焉得思如陶謝手令渠述作與同遊

江村

前人

清江一曲抱村流，長夏江村事事幽。
自去自來梁上燕，相親相近水中鷗。
老妻畫紙為棋局，稚子敲鍼作釣鉤。
多病所需唯藥物，微軀此外更何求。

春日江村五首

前人

農務村村急，春流岸岸深。
乾坤萬里眼，時序百年心。
茅屋還堪賦，桃源自可尋。
艱難昧生理，飄泊到如今。
迢遞來三蜀，蹉跎又六年。
客身逢故舊，發興自林泉。
過懶從衣結，頻遊任履穿。
藩籬頗無限，恣意向江天。

種竹交加翠栽桃爛熳紅經心石鏡月到面雪山風赤
管隨王命銀章付老翁豈知牙齒落名玷薦賢中

扶病垂朱紱歸休步紫苔郊扉存晚計幕府媿羣材燕
外晴絲卷鷗邊水葉開鄰家送魚鼈問我數能來

郡盜哀王粲中年召賈生登樓初有作前席竟為榮宅
人先賢傳才高處士名異時懷二子春日復含情

泛溪

前人

落景下高堂進舟泛迴溪誰謂築居小未盡喬木西遠

郊信荒僻秋色有餘淒練練峯上雪纖纖雲表霓童戲
左右岸罟弋畢提携翻倒荷芰亂指揮徑路迷得魚已
割鱗採藕不洗泥人情逐鮮美物賤事已睽吾村靄冥
姿異舍鷄亦棲蕭條欲何適出處無可齊衣上見新月
霜中登故畦濁醪自初熟東城多鼓聲

春水生二絕

前人

二月六夜春水生門前小灘渾欲平鷓鴣鷦鷯鵲
吾與汝曹俱眼明

又

前人

一夜水高二尺強數日不可更禁當南市津頭有船賣
無錢即買繫籬傍

春水

前人

三月桃花浪江流復舊痕朝來沒沙尾碧色動柴門接
縷垂芳餌連筒灌小園已添無數鳥爭浴故相喧

溪漲

前人

當時浣花橋溪水纔尺餘白石明可把水中有行車秋

夏忽泛溢豈唯入吾廬蛟龍亦狼狽況是鼉與魚茲晨
已半落歸路跬步踈馬嘶未敢動前有深填淤青青屋
東麻散亂床上書不意遠山雨夜來復何如我遊都市
間晚憇必村墟乃知久行客終日思其居

荆門浮舟望蜀江

唐李白

春水月峽來浮舟望安極正見桃花流依然錦江色紅
色淥且明茫茫與天平逶迤巴山盡遙曳楚雲行雪照
聚沙雁花飛出谷鶯芳洲却已轉碧樹森森迎流目浦

煙夕揚帆海月生江陵識遙火應到渚宮城

野望

前人

西山白雪三城戍南浦清江萬里橋海內風塵諸弟隔
天涯涕淚一身遙唯將遲暮供多病未有涓埃答聖朝
跨馬出郊時極目不堪人事日蕭條

野望因過常少仙

前人

野橋齊度馬秋望轉悠哉竹覆青城合江從灌口來入
村樵徑引嘗果栗斂開落盡高天日幽人遣未迴

晚秋陪嚴鄭公摩訶池泛舟得溪字

前人

湍駛風醒酒船回霧起隄高城秋自落
離樹晚相迷坐
觸鴛鴦起巢傾翡翠低莫須驚白鷺為伴宿青溪

陪鄭公秋晚北池臨眺

前人

北池雲水閣華館闌秋風獨鶴元依渚
衰荷且映空采
菱寒刺上踏藕野泥中素櫟分曹徃金盤小徑通
萋萋
露草碧片片晚旗紅盃酒霑津吏衣裳與釣翁
異方初

艷菊故里亦高桐
搖落關山思淹留
戰伐功嚴城殊未
掩清宴已知終
何補參軍乏歡娛
到薄躬

雲山

前人

京洛雲山外音書靜不來
神交作賦客力盡望鄉臺
衰疾江邊卧親朋日暮迴
白鷗原水宿何事有餘哀

偶宴西蜀摩訶池

唐暢甫

珍木鬱清池風荷左右披
淺觴寧及醉慢舸不知移
蔭林簾光冷照流簪影敬
胡為獨羈者雪涕向連漪

晦日益州北池陪宴

唐司空曙

臨泛從公日
僊舟翠幕張
七橋通碧水
雙樹接花塘
玉燭收寒氣
金波隱夕光
野聞歌管思
水靜綺羅香
遊騎紫林遠
飛橈截岸長
郊原懷灞澹
陂漾寫江黃
常侍傳花詔
偏裨同羽觴
豈令南峴首
千載播餘芳

昇僊橋

唐羅隱

危梁枕路岐
駐馬問前時
價自友朋得名
因婦女知直
須論運命不得
遲文詞執戟君
鄉里榮華竟若
為

題龍華山

唐郭震

昔年曾到此山迴，百鳥聲中酒一杯。最好寺邊開眼處，

段文昌有讀書臺。

出古今詩話

過摩訶池二首

宋祁

十頃隋家舊鑿池，池平樹盡但回隄。清塵滿道君知否，半是當年濁水泥。

池邊不見帛闌船，麥壠連雲樹繞天。百歲興衰已如此，爭教東海不為田。

春日出浣花

前人

側蓋天長蕩曉霏暖風才滿使君旗水通江渚容魚樂
草徧山梁報雉時場雨減塵盤馬疾樓雲礙曲進觴遲

少陵宅畔吟聲歇

杜子美宅在浣花溪上

柳碧梅青欲向誰

憶浣花泛舟

前人

早夏清和在晴江沿汭時岸風搖鼓吹波日亂旌旗醉
帶牽湘蔓游鬢撲綠蕤樹來驚浦進山失悟舟移雅俗
西南盛歸輶東北馳此歡邠復得拋恨寄天涯

避暑江瀆池

前人

溪淺容槁短舟移覺岨長煙稠菱荷葉霞熱荔支房枝
疊參檣鼓杯寒十饋漿便成逃暑醉官事底相妨

江瀆泛舟

吳中復

曉來一兩過池塘江瀆祠前館宇涼翠水細風翻畫浪
紅蕖微露浥秋香欲停畫舫收船楫旋折圓荷當羽觴
逃暑豈須河朔飲遲留車馬到斜陽

和

張唐民

雨餘雲重晝陰長
水漲風塘氣味涼
菡萏入舟風旋破
襟裾明日汗尤香
忽生勝趣都忘事
不待交醺自引觴
碧玉琉璃大如斛
吾徒真不謝高陽

和

雍方知

火老金柔尚伏藏
快風收雨送新涼
人隨竹馬來方盛
酒入蓮筍特地香
春草與誰占夢句
白雲空自頌觥觴
欲知此日公之樂
正喜西城息亢陽

和

韓宗道

綠錦池塘藻荇芳
擎舟清泛水風涼
千珠翠颭圓荷雨
百和交銷寶篆香
暫駐旌麾開燕豆
只憑談笑樂杯觴
留連晚景殊多適
無奈黃昏送夕陽

和

謝景初

雨飛暑館變秋堂
息駕林祠意緒長
筍脫萬苞風韻玉
蓮開百畝水浮香
楸盤力戰碁忘味
筠簟清吟扇遞涼
心惜吏閒文酒樂
雅歡未既即離觴

和

韓宗道

蕭洒叢祠古道傍
偶來乘興興何長
珊珊翠竹寒成韻
冉冉紅渠細度香
雲暗塵頭雲雨急
風來水面葛衣涼
天涯一笑良難得
預借驪歌送別觴

昇遷

范鎮

去用文章結主知
出銜恩旨諭皇威
相如終古成輕詭
橋上空題駟馬歸

仲遠龍圖見邀學射之遊先寄五十六言

前人

幾年魂夢寄西州
春晚歸逢學射遊
十里香風塵不動
半山晴日雨初收
指攜武弁呈飛騎
次第紅粧數勝籌

故事往來皆呈馬騎設射
朋衆賓皆射遣官妓記籌

夾道綺羅瞻望處
管絃旌旆

擁遨頭

自和

古來西蜀夢刀州
太守因民作勝遊
千里間風皆遠至
一春饒雨定秋收
詩篇迭唱無停筆
酒盞頻行不記籌
老退歸逢出郊會
路人應笑雪盈頭

武擔 蜀事補士

宋京

君不見蜀王妃子墓突兀成都城中若山積墓頭寒鏡
澁無光妬月欺煙化為石鴻荒無根憑野史直謂山妖
化妃子臨終未免懷首丘運土山中葬於此山名武擔
錦江邊用是得名千萬年如今佛閣倚空翠老木盤鬱
摩蒼天晴雲入穴西山出捲簾坐見嵐光滴安得文如
汲冢書免使後人疑往昔

龜化 蜀事補士

前人

君不見秦時張儀築少城土惡易敗還顛傾力疲智竭
築未就神龜為爾開其靈龜行所至城不圯板築之功
以此已功成隱去智且賢城下於今祇流水殷勤高謝
余且網不夢元君寧自放儀兮儀兮奈爾何口舌縱橫
飾欺妄天使神龜籠爾術不言而行功自畢安得人靈
若爾靈照見百為心遐逸

游海雲山

喻汝礪

渺渺天宇初便復有此山清辰及茲游遐想百代前來

者幾何人當時各為歡淑質揚妙舞哀終遞清彈樂事
坐如昨芳歲已屢殫向來所游人落葉不復還迴然散
遠目感之為長歎竹林舊所適鵲巢豈昔眠念誰當久
存而不住所緣破涕聊一怡山川却萋妍未知後世士
誰復當來旋

錦江思

李新

獨詠滄浪古岸邊牽風柳帶綠凝烟得魚且斫金絲鱸
醉折桃花倚釣船

合江舟中作

晁公遯

雲氣昏江樹春流沒釣磯如何連夜漲似欲送人歸亂
石水聲急片帆風力微舟師且停櫓白鷺畏人飛

沱江

尚勝三年謫終慙萬里馴極知行路澁可忍在家貧歲
晚沱江綠雲深錦樹新相思肯如月夜夜只隨人

學射山相傳蜀後主劉禪習射於此因以得名

有感二作

何耕

苦無雄畧但兒嬉尚想山頭學射時忽報陰平魚貫入
可憐一鏃不能施

脩明國政保關山豈在馳驅縱送間空使流人登劔閣
向風長喟笑庸孱

摩訶池

陸游

摩訶古池苑一過一消魂春水生新漲煙蕪沒舊痕年
光走車轂人事轉萍根猶有宮梁燕銜泥入水門

蜀宮中舊

泛舟入此池曲折十餘里今府
後門雖已為平陸然猶號水門

夏日過摩訶池

烏帽翩翩白紵輕
摩訶池上試閒行
淙潺野水鳴空苑
寂歷斜陽下廢城
縱轡迎涼看馬影
袖鞭尋句聽蟬聲
白頭散吏原無事
却為興亡一愴情

浣花溪

馮備

浣花溪邊濯錦裳
百花滿潭溪水香
寶奩散盡有霜戟
草屨匹馬不可當
當時濯衣只偶爾
豈似取履張子房
烈烈遽見蔽此蜀
喪亂懷爾徒悲傷
年年春風媚楊柳

綵纜媼妯雲霞張溪邊遊冶紅粉娘了不識字空悠颺
採花蕩漿不歸去暮隔煙水眠幽芳

游侍郎堤

陸游

曉從北郭過西城十里沙堤似席平澹日向人供帽影
微風傍馬助鞭聲歡情寂寂隨年減俗事紛紛逐日生
到處每求佳水竹晚途牢落念歸耕

行武檐西南村落有感

前人

騎馬悠然欲斷寬春愁滿眼與誰論市朝遷變歸蕪沒

礪谷銑牙互吐吞一徑松楠遙見寺數家雞犬自成村

最憐高冢臨官道細細煙莎遍燒痕

有大家高數丈旁又一冢差小莫知

何代人也俗號太子墓

遊學觀射次壁間詩韻

前人

走徧人間鬢尚青爾來樂事滿餘齡傍潭秋爽鉏甘菊
登嶽春暄采茯苓閒倚松蘿論劍術靜臨窻几勘丹經
巖光本是逃名者安用天文動客星

三月二十日出郊泛舟西津得子字

李燾

春日行郊垞南風初唱予相携出城郭著意買江湖句
好從兒覓杯乾任客呼長年足詩酒此外復何須

山東郭見山

楊甲

二年不見山見之喜不休舉手三揖之山遠不領頭疑
我隨塵土已與俗同儔羣峰次第走狼怒不可收稍稍
望雲脚下見八九丘近前與之笑顏色漸和柔迎我以
松風與我相獻酬憐我不識路道以溪水流豈其終愛

予為此世所仇却之實不忍儻有緩急投一官最下策
包裹辱與羞百年在平地亦有一日憂誰能無飢渴往
與青山謀

靈泉山中

前人

小縣相籠合濛濛數百家菓蔬爭晚市樵牧亂晴沙落
日平沙迴青山細路賒偶居無事在隨意問桑麻
野邑山圍盡風煙更可憐客情牛鐸外農事藕花前聚
汲松根井寬愁石底泉雲安頂斗水詩興亦超然

勝地僊靈宅微官也謫居焚香他日夢隱几向臺書小
睡便山雨長齊稱野蔬逢人問無恙滿意說樵漁

日下溪林薄芊芊肅晚暉閉門成隱飲小水亦生肥醉
著溪藤杖歸來木葉衣狂歌有虎兕吾道只應非
何處長松寺雨花雲外臺山從百曲轉路入九關迴老
檜成龍盡殘柯借鶴來人間斤斧亂風聲夜聲哀

靈泉山上晚望

前人

野曠樹還亂林深煙更微天隨殘日盡雲掣斷山飛玉

壘風煙濶秦城草木非憑高千萬事今夜客裳衣
遠目昏難盡青山濶展圍眼花隨處亂雲樹一時飛秋
至客愁遠路難心事違更憐人北望不見雁南飛

合江泛舟

前人

莫踏街頭塵寧飲城東水江頭放船去葦間問漁子
深魚有家鳬雁在中沚得酒可以歌得樹可以樣年年
舟中客顏色不相似風波無前期遊者亦如此短篙醉
時策遠山醉時几我老不奈醒日落西風起

寒食遊學射山

前人

疾風吹沙天茫茫日落未落原野黃山空無人不碌碌
路長馬饑石齧足荒臺古林翳雲族何人剗岳縛層屋
當時萬騎填山谷至今拾寶多遺鏃故國山川愁遠目
人世悲歡風雨速凌高舉酒天為蹙手攀巖木扣雲木
何人唱我淒涼曲興亡一取冥冥綠野水平燕飛鴈鶩

成都文類卷三

欽定四庫全書

成都文類卷四

宋 扈仲榮等 編

詩

學校

題石室

唐裴鉞

文翁石室有儀形庠序千秋播德馨古柏尚留今日翠
高岷猶藹舊時青人心未肯拋羶蟻弟子依前學聚螢

更歎沱江無限水爭流祇願到滄溟

益州州學聖訓堂詩

何郊

益為藩捍西南隅物衆地大稱名都擇守來頒茲土政
治人頗與他邦殊差跌一有戾條教便宜皆得行黜誅
羣姦帖息不敢動無復弄兵覬穿窬任威或謂一時事
立政恐非長世圖豈無達識究是否重在改作徒嗟呼
仲翁文翁字裔孫有偉度敢決不以常文拘當官勇欲除
弊法伊憂內惻仁心孚視人無異遠方意威刑惠政還

相須始時歲荒力賑救坐使餓殍成完膚既而為俗思
根本其在立學陳師謨大開儒庠務誨導秀民聳慕紛
來趨遂言謂署鴻生職使演經傳傳諸徒奏函纔上聞
法座詔劄即日來諧俞詔云信汝辦治蜀緩任威罰先
文儒公心感激侈上賜刻在金石尊神謨覆之大厦膀
美稱日久傳著期無渝邦人承風為盛事觀者填道來
于于嗟嗟多士其聽命勿即邪經安夷涂師無訛聖生
率教信尚姬孔尊唐虞施之鄉黨勵雅俗仁誼得以相

持扶漢王初始盛文學起自蜀國行中區本朝教化視
三代建元安可為齊驅吾君訓辭諭萬里義均盤誥茲
宣敷吾守教本樹一國學盛洙泗相涵濡臣謀君從協
大義聖哲倡和真同符欲歌盛節示萬古才不逮志嗟
其愚

復修府學故事

韓絳

文翁石室已千秋世有興衰化自流賢雋相望承學粹
朝廷繇此得人優

蜀中名士
布在顯要

太平典禮當傳習盛際文

章正講求師友琢磨期不勦岷我秀氣與雲浮

禮殿

蜀事補止

宋京

君不見漢人制作禮殿存法度嚴廣分卑尊祗今年數
不可攷列畫古帝丹青昏晉人遺書刻柱邊字劃刻決
骨氣全衣冠真不異闕里事業直笑銘燕然鏘鏘似有
環珮聲七十二子羅簪纓閉藏濁世如有待開眼今日
觀文明陳倉石鼓歸辟雍大成門閥何穹崇安得兒取
禮殿制太學西有宣尼宮

石室蜀事補亡

前人

君不見西漢文翁為蜀守蜀學不居齊魯後諸生競欲
保翁名石室鐫磨貴難朽東漢高公又幾時為作石室
還如茲至今二室堅且久文公高公名不衰世間可傳
唯鐵石石終可泐鐵終蝕古人好事留其名石室存亡
竟何益漢水沉碑知在不叔子名存空峴首安得眼看
石室銷要知二子名終有

過府學遂謁文公堂

喻汝礪

綠荻負幽隱高槐泛輕涼各誇一時好披風互低昂詎
知五月中微陰颺催黃我行魯侯宮獨謁文公堂若人
骨已朽道在斯不亡遂令蜀文章照耀日月傍世事俱
腐臭斯文真久長靡顏能幾時蕭條翳墟荒富貴豈不
好千載同一傷三歎過泮宮撫已涕自滂

府學十詠

李石

禮殿

漢人祀周公為先師故鍾會記云周公禮

殿范蜀公鎮云屋制甚古非近世所為秦漢以來有也內翰王素云其屋制絕異今制後之葺者惜其古不敢改作

蜀侯作類錦水湄先聖先師同此室巍然夫子據此座殿以周公名自昔聖人兩兩如一家均是周人先後出東家想見中夜夢猶與公孫同袞烏斯文授受乃闕天不為漢唐加損益我時來視俎豆事重是漢人斤斧迹漢宮制度九天上散落人間此其一多因豐屋起戎心

獨此數椽綿歲歷規模嵒嵒東魯似氣象縹緲西岷敵
竹松猶是斯干詩風雨方知棟隆吉雖然漢獻來至今
閱時已多駒過隙中間豈無烏鼠慮妙斷不知難輒易
工師不揆亂如麻敢向殿門言匠石詩書譬彼尚闕文
後學如何補遺逸祖龍非意竊登牀科斗有心求壞壁
舊章僅在命如絲誰勒吾詩勝丹漆

石室

漢孝景時太守文翁始作石室西為文翁

稍南為高朕比文翁石室差大皆有石像
朕或為勝宋溫之璋洗石以辨之乃朕字

也

詩稟切

蜀守席旦奏秩文翁高朕於祀典

竊疑二室者蜀人所以祠二公之意非必
自作

來為人所愛去為人所思若看文與高慈惠蜀之師至
今窟中像凜凜建立時知非伯有室定是同鄉時蜀人
愛二公遠與千載期其間幾灰劫付與一炬炊保此歲

崢嶸不動山四維東家好鄰里豈任惡少窺祠前二古
柏外乾中不萎勿作剪伐想恐是神明遺可憐墻壁間
我冠劍挂願烈士不平氣好在淮西碑

殿柱記

范蜀公云其柱鍾會隸書刻其上按會與
鄧艾同入蜀在咸熙元年甲申距漢獻興
平元年甲戌凡七十一年矣艾蓋追文翁
高君之美而書也

蒼龍甲戌歲修築周公殿文翁至高君學校已再變順
考興平年實紀漢之獻或云鍾會書入木字隱見自獻
而至會朔厯斗杓轉會初入蜀時意不止弱禪有如猿
猱繫百巧欲伺便殺女不作難機鋒劇刀箭會書固出
繇家法素所善至學父筆迹暮夜走郵傳老昭豈易欺
真偽猝難辨欺昭爾尚可蜀士多秀彥當其下筆時寧
不愧顏面雖蒙黼藻文不揜糞土賤周公儻有靈白日

下雷電

鍾會善學人筆迹學父書
以誑司馬昭昭遂殺父

左右生題名

或云江陽寧蜀遂寧晉原以晉志攷之江陽蜀置此郡寧蜀遂

寧晉原皆是宣武平蜀後置

范蜀公云西漢時諸生姓名文學祭酒典學從事各一人司儀主事各一人左生七十三人右生三十人可考者僅百許人亦載於歐陽文忠公集古錄

蜀地雖遠天之涯蜀人只隔一水巴自從文翁建此學此俗化為齊魯家類林春風桑樞熟集鼓坎坎聞晨撾

諸生堂與分左右相比以立如排衙九牧之金充歲貢
挾出金鑛遺其沙鄉雲褒武皆蜀秀虎豹各自雄鬚牙
兩京得人廣數路忍使丘中留子嗟不然題名百許輩
無一顯者何謂耶我亦典學老從事試向坐中尋益嘉
庾亮版益嘉為勸學從事亮正旦大會人士率多時彥
褚裒問亮江州有益嘉其人何在亮云在坐卿且自覓
今左右生有典學從事意亦嘉所官也

禮殿晉人畫

耆舊傳云西晉太康中益州刺史張收畫

而東晉王右軍已有書問蜀中事知有漢
時講堂在知畫三皇五帝以來人物精妙
畫文欲因摹取得廣異聞則疑非收輩所
畫耳然畫之後前既無可攷則當以收為
正嘉祐中王素命摹寫為七卷總一百五
十五人為成都禮殿聖賢圖蜀守席益又
嘗摹其容貌名位可別識者一百六十八

人于石經堂

又按元豐郭若虛圖畫見聞誌云漢文翁學堂在益州昔

經顏廢高朕復緒立圖畫古人聖賢之像及瑞物於壁未知孰是則與者舊傳小異

成都名畫窟所至妙宮牆風流五代餘軌躅參隋唐其間禮殿晉畫為鼻祖未數後來鴻鴈行畫者果誰歟或云名收人姓張右軍問蜀守墨帖來縑緗乃知前輩人不愛時世粧范瓊杜措李懷袞荒佛怪驅喝雷電筆意窺渺茫不若收所畫上自皮羽之服下至垂衣裳盤古衆支派帝霸皇與王君臣分聖賢有如虎豹龍鳳殊文章視之若有見日月星象空中垂耿光聽之如有聞

銜牙玉佩鳴以鏘三古以降歷今世視聽所感猶一堂
乃知此畫自神品碌碌餘子非所望吾道久已屈二氏
爭顏頑豈唯收也見絀餘子下尚有公議老我雙鬢蒼

齊人畫禮器

齊永明十年刺史劉悛畫殿壁器服如三

禮圖帝益摹本於石經堂

悛或作悛或云
劉悛弟瑱之筆

今止
矣

漆器侈初俗長袖喧都城如何古遽殿天開垂日星奇

奇奇與怪怪懞懞不識名我嘗閱此畫肇自齊永明人
間無備物未易窮丹青一作因郊丘盛禮嚴天庭器服
各異數於此集大成仰瞻萬乘聖遠想三代英蟻蟲容
著足鴛鴦參結綰西歸放天梅鈞天夢初醒心焉感此
畫眼角泣欲零所見恐未夥蜀都問君平

黃筌畫屏

屏已失其左右二扇獨中一山水屏在耳
石到官驗問所失月日申府蓋紹興三十

年三月二十九日府下兵馬司捕賊不獲
阿荃千頃本曾中學道分明畫手同筆削來追麟獲後
丹青為洗馬羣空登堂欲與修遺履穴戶何由返大弓
尚有滄溟垂素壁且阻蠅誤污屏風

古柏二首

東坡先生送家安國教授成都云蒼苔高
朕室古柏文翁亭事具成都古今記趙次
公詳其事于東坡詩注有妄庸人請於府

恐壞屋欲去之石曰屋壞不修伐此柏不
可復且祠廟古迹林木條禁甚明併舉東
坡柏堂詩爭之得全

驕容落盡雪霜浮偃蹇空貽社櫟羞濡沫東家雖借潤
風煙西爽亦宜秋皮災已覺神明露心在猶懷剪伐憂
鐵鐐何當絆龍脚夜深雷雨卷潭湫

石欲作鐵索絆之
以防風雨之暴未

果僅能累石
作籠固其足

思人誰復念婆婆窟室崖陰未易磨四十圍間看溜雨

三千年後數恒河不堪與世供狙杙尚許遺民占烏窠
從此便名夫子樹康人斤斧奈予何

監者王朝辦進士
年八十餘矣學官

憫其老不
忍易之

秦城二絕

張儀司馬錯所築自錯入蜀秦惠公乙巳
歲至皇宋紹興壬午一千四百七十八年
雖顏祀所存如崖壁峭立亦學舍一奇觀
也

泮林堂後面崢嶸不道詩書恨未平瓜蔓沉坑餘鬼哭
此間學校倚秦城

漸成雉堞繞蠶叢漢棧分明蜀徼通只說金牛能誑客
已輸巴粟到關中

石經室

偽蜀廣政七年其相母丘裔按雍都舊本
九經命平泉令張德釗書而刻諸石是歲
實晉開運甲辰也蜀守胡宗愈作堂以貯

石經席益增葺為記

我來一登石經堂從以諸生行兩廡諸生讀經半頭白
問以始終籍不語我聞此經昔中都中郎所隸乃其祖
邇來離亂已忘失楷本僅能傳蜀土蜀土閤位供掃除
獨此仍為盛時取為將嚴鐫守重局護以繚垣崇邃宇
列之學官豈無意豈但闕文存夏五大開明鏡別妍媸
時扣洪鍾諧律呂後生不復事丹鉛抵死唯知守籐褚
字音隨口妄蜺霓點畫分毫謬魚魯日月當天空委照

盲俗相欺紛莫睹石經雖古奈爾何人競傳今不傳古
行行矧肯捩眼覩蘇剝苔封費撐拄墜鏡僅免飽鰕魚
隘道爭來宅狐鼠此間鄒人儻借問為問石經誰是主
一昨敵門肆訶斥幾度向牆誇傴僂登登閣閣隱金搥
聒耳散空垂電雨蠟薰煤染連作卷玉軸錦裝如束杵
豈無一物媚權豪幾紙才堪博圭組爾之所得固么麼
我則何由寬搏拊一搥只作一字訛訛至萬千那復數
石經之害此其大縱有鬼神莫可禦憶昔嘗為博士官

首善堂中容接武心知不是世間書雲漢森然城百堵
恢恢帝所有餘地忍使石經留外府便當連舸下矍塘
飛上三山如插羽縑紉外謬鍾鼎暗天罅豈容無一補
巍巍玉帝殿中央河洛東西翼龍虎雖然斯文屬興廢
帝既有心天亦許作詩未用擬韓公考篆庶幾追古鼓

成都文類卷四